

*NOVA ZBIRKA POEZIJE SABAHUDINA
HADŽIALIĆA*

“Šapat u tami”

Na naslovnoj stranici najnovije zbirke pjesama nalazi se fotografija stećka iz XIV vijeka sa križem i polumjesecom nedavno pronađenog na brdu Hum kod Bugojna

BUGOJNO - Sabahudin Hadžialić, rođeni Mostarac i diplomirani žurnalista, diplomirao na Fakultetu političkih nauka u Sarajevu, odnedavno je angažovan kao stručni saradnik za informisanje u Ministarstvu obrazovanja, nauke, kulture i sporta Srednjobosanskog kantona i svakodnevno putuje iz Bugojna u Travnik i natrag...

Kada se oporavljao od ranjavanja u najtežim trenucima agresije organizovao je u Bugojnu kurs novinarstva jer su se mnogi u ratnim uvjetima počeli više ili manje uspješno i sa različitim ciljevima baviti "pisanjem za novine". Stigao je u maju ratne 1994. godine u Bugojnu objaviti prvu verziju svog udžbenika "Uvod u novinarstvo" opravdano očekujući i drugo izdanje u boljoj opremi i u većem tiražu. Uspio je sakupiti i stihove nastale od 1992. do 1996. godine i uvrstiti ih u svoju prvu zbirku "Amanet", koja je promovirana u Mostaru, Sarajevu, Travniku, Zagrebu, Bugojnu, Zenici i u drugim gradovima. Ova knjiga se dvije godine kasnije pojavila u Francuskoj na francuskom jeziku i u luksuznom izdanju sa naslovom "Testament" u izdanju "Artootema". Štampana je u 1.500 primjeraka u ateljeu "Braber" na specijalnom šamoa-papiru i ilustracijama koje je pravio **Annie Jean-Paul**, a predgovor je napisao **Abbé Pierre**. Na francuski jezik su ovu zbirku preveli **Christiane Dupont**, **Edouard D'Aoust**, **Fatima Pirić** i **Faris Rujanac** i sav prihod od ove knjige (prodavane po 100 FF ili oko 30 DM) upućen je kao pomoć djeci poginulih roditelja u BiH uz podršku nevladine

humanitarne organizacije "Promethee" iz Grenobla, koja vodi brigu o stvaranju tolerancije i razumijevanja među ljudima. Sabahudin je kao gost izdavača bio u Francuskoj prisustvujući promociji svoje knjige u mnogim kulturnim centrima u oktobru 1998. godine.

Novo priznanje iz Francuske stiglo mu je u junu prošle godine kada je izdavačka kuća "Maison de la Poesie Rhone-Alpes" objavila svojevrsnu kompilaciju pod naslovom "Paroles de Paix" ("Parole mira") - antologiju pjesama posvećenih miru poznatih autora iz cijelog svijeta. Između tri pjesme **Bertolda Brehta** i **Federika Garsije Lorke** objavljena je i pjesma Sabahudina Hadžialića iz Bugojna "Galeb". U oktobru prošle godine španski časopis za poeziju "Adriadna" objavio je tri Sabahudinove pjesme: "Sizif", "Testament" i "Galeb" u prevodu **Raguela Peralona Moralesa**. Prethodno je zamolio Sabahudina da mu dozvoli promjenu naslova pjesme "Amanet" u "Testament" i uz pjesme je objavljena kraća Sabahudinova biografija.

Upravo je iz štampe izašla najnovija Sabahudinova zbirka pjesama "Šapat u tami" sa recenzijama **Mustafe Smajlovića** i **Milana Pekića** i ilustracijama **Esme Saračević** iz Sarajeva, a na naslovnoj strani ove knjige neobičnog, ali modernog formata je prvi put objavljena fotografija stećka iz XIV vijeka sa križem i polumjesecom, pronađen na brdu Hum kod Bugojna. Promocija zbirke biće u septembru ove godine u mnogim gradovima BiH.

Mustafa GAFIĆ